

Zemlje članice Evropske unije su popustile pod pritiscima Evropske komisije i multinacionalnih korporacija i u zadnji čas produžile dozvolu za upotrebu glifosata na period od pet godina. Ovim je izignorirana rezolucija Evropskog parlamenta o potpunom napuštanju glifosata na farmama do 2020. godine, kao i zabrani upotrebe glifosata na javnim prostorima.

Produženje dozvole je izglasano zahvaljujući glasu Njemačke, koja je na prethodnom glasanju za isti prijedlog bila suzdržana. To je izazvalo skandal, jer je njemački ministar poljoprivrede podržao prijedlog, uprkos protivljenju njemačke ministrice životne sredine. Protiv produženja dozvole za glifosat su glasale Francuska, Grčka, Belgija, Hrvatska, Italija, Kipar, Luksemburg, Malta i Austrija, dok je Portugal bio suzdržan. Francuska je najavila da bez obzira na odluku na evropskom nivou planira da zabrani u potpunosti glifosat u roku od tri godine.

Adrian Bebb, iz Friends of the Earth Europe, komentarisao je glasanje: „ Glifosat šteti prirodi, vjerovatno izaziva karcinom, te podupire industrijsku poljoprivredu koja degradira zemljište koje nam je neophodno. Današnje odobrenje, čak i ako samo na pet godina, je propuštena prilika da se riješimo ovog rizičnog herbicida i počnemo oslobađati poljoprivrednike iz začaranog kruga hemikalija. Još pet godina glifosata će ugroziti naše zdravlje i životnu sredinu, i to je veliki korak unazad za održive poljoprivredne metode.“ Dozvola za upotrebu glifosata u Bosni i Hercegovini takođe ističe u decembru 2017. godine.
Izvor: czzs.org